

“Ai Dios?”

Mayoria hende na nos isla ta bisa ku nan ta “kristian.” Ma ora nos kòrda ku un “kristian” ta un **siguidó** di Kristo, ta opvio ku hopi hende ta “kristian” pa nòmber so. Lealdat na Kristo ta un konsepto straño pa nan. Hopi di esnan ku ta bisa ku nan ta “kristian”, no ta hasi loke Palabra di Dios ta bisa.

Nota un ehèmpel simpel di e echo aki. Un di e Dies Mandamentunan ta bisa, “*No uza e nòmber di SEÑOR bo Dios en bano...*” (Eksodo 20:7). Bo ta obedesé Dios riba e punto ei? Pa hopi hende, ni un dia (talbes, ni un ora) por pasa sin ku nan ta usa Dios Su nòmber pòrnada den nan kombersashonnan. Pa nan, ta algu masha normal pa ofendé Dios di e forma ei.

Hende ku ta konsiderá nan mes “kristian,” regularmente ta bisa “ai Dios” pa mil i un motibu. (Algun hende ta insistí ku nan ta bisa “Ai Djo” i ta pretendé ku esei ta ménos malu.)

Analísá e ekspreshon aki. Bo ta dediká hopi tempu pa prepará un rapòrt pa entregá djis aki ratu. Den bo purá, bo ta plama kòfi riba un página. Sin pensa mes, “Ai Dios!” ta sali for di bo boka. Pakiko bo ta usa e ekspreshon ei? Ta Dios a ponébo plama kòfi? Ta Dios Su falta ku bo no tabata mas kouteloso? Fuera di e echo ku Dios a prohibí bo di usa Su nòmber en bano, ta inhustu pa kulpa Dios pa bo eror.

Bo nòmber ta hopi presioso pa bo, pasobra bo nòmber ta representá bo persona! Kon lo BO sinti si tur hende a usa BO nòmber di e mésun forma? Kon lo BO sinti si tur hende a kulpa ABO pa tur kos ku ta bai robes den nos bida? Ora outo ta nenga start: “Ai Linchi!” Ora yu ta kibra glas: “Ai Linchi!” Ora nan ta poncha den wega di sòfbòl: “Ai Linchi!” Ora yu ta haña un 4 riba su rapòrt pa spaño: “Ai Linchi!” Ora nan ta lubidá oloshi na kas: “Ai Linchi!” Bo lo haña e ekspreshonnan ei sumamente ofensivo! Abo no okashoná e eventonan desafortuná ku nan ta pasa den! Bo no ke pa hende lastra bo nòmber den stòf. **Klaramente, e kustumber ei ta ofensivo pa Dios tambe!**

Ademas, nos ta usa nòmber di Dios Yu pòrnada. “Hesus!,” “Hesu!,” i “Hesusea!” ta usá tur ora. I komo sifuera no ta basta pa ofend’E na papiamentu, awor nos ta rebahá Su nòmber na ingles...i ken sa kuantu otro idioma?

Regularmente nos ta tende otro ekspreshon ku ta ofendé Dios. Ku frekuensia nos ta bisa “Si Dios ke.” Beibel mes ta promové e uso di e palabranan aki. Santiago 4:13-15, ta spierta esnan ku ta biba komo sifuera NAN ta hasi i deshasi segun nan ta haña ta bon, sin hasi kaso di Dios: “*Mihó boso bisa ‘Si Señor kier, nos lo biba i tambe hasi esaki òf esaya.’*” Ta bon pa bisa “Si Dios ke”

konsiente di loke bo ta bisa. Ma normal nos ta bis’é sin pensa mes kiko nos ta bisa, i esei ta un otro forma di usa Su nòmber pòrnada. I pió, nos por tende hende bisa, “Nos lo topá na bar, si Dios ke.” E ekspreshon ei no ta solamente falta di rèspèt pa Dios, ma tambe ta ridíkulo. **Si nan ta hasi loke Dios ke, nan lo no bai bar mes!**

Ta e mésun kaso ku “Dios grasía,” “Dios libra!,” “Dios sa,” “danki Dios” i otro ekspreshonnan similar. Si nos ta usa nan pa kustumber, sin paga tino na loke nos ta bisa, nos ta usa Dios Su nòmber pòrnada.

Bo ke pa hende apresia i respetá bo. Bo no ke pa nan lastra bo nòmber den stòf. Igualmente, **ta inaseptabel pa hende ku ta yama nan mes “kristian” demonstrá tantu falta di rèspèt pa Dios, kulpando E pa tur nan problemanan, lastrando Su nòmber den stòf.**

E Dies Mandamentunan no solamente ta bisa: “*No uza e nòmber di SEÑOR bo Dios en bano...*” Ultimo parti di e teksto ta bisa: “*pasobra SEÑOR no ta keda sin kastigá esun ku uza Su nòmber en bano*” (Exodo 20:7). Ta bon pa realisá ku e piká aki no solamente ta inaseptabel; e tambe ta kastigabel!